

Otac i pet sinova osumnjičeni za organizirani kriminal

Kako je navedeno u današnjem saopćenju Tužilaštva BiH, njih sedmerica su pod istragom zbog sumnje da su učinili kazneno djelo organiziranog kriminala. Ukoliko se sudskim postupkom dokaže krivica, prijeti im zatvorska kazna od najmanje tri godine. Tužilaštvo ih sumnjiči za organiziranje krijumčarenja ilegalnih emigranata sa područja Turske i drugih država, preko BiH, prema Hrvatskoj i dalje prema zemljama EU-a.

Određivanje mjere pritvora predloženo je zbog činjenice da su otac i sinovi više puta osuđivani i da postoji opasnost da bi boravkom na slobodi mogli ponoviti kazneno djelo, a pritvor za državljanina Turske je predložen iz razloga što osumnjičeni ne posjeduje državljanstvo BiH te bi odlaskom iz BiH postao nedostupan pravosudnim organima, s obzirom da Republika Turska ne izručuje svoje državljane.

Akcija pod nazivom „Loka“ je provedena po nalogu Tužilaštva BiH, s ciljem otkrivanja i procesuiranja organiziranih kriminalnih grupa koje se bave krijumčarenjem ilegalnih migranata. Tužilaštvo BiH nastavlja istragu kako bi se podigla optužnica, a Sud BiH će pritvor potvrditi ili odbaciti rješenjem.